

四庫全書

集部

欽定四庫全書

唐詩品彙卷四十五

明 高棟 編

五言絕句八

旁流

以下有姓氏無字里
世次可考者五人

荆叔

題慈恩塔

客齊五筆云慈恩塔有荆叔一絕字
極小而端勁最為感人其詞旨意高

遠不知為何時人必
唐世詩流所作也

漢國山河在秦陵草樹深暮雲千里色無處不傷心

李牧

幽情

幽人惜春暮潭上折芳草佳期何時還欲寄千里道

張元宗

元一作九

登景雲寺閣

胡馬飲河路我家從此遷今來獨垂淚三十六峰前

潘佐

送人往宣城

江畔送行人
千山生暮氛
謝安團扇上
為畫敬亭雲

張顛

清溪汎舟

旅人倚征棹
薄暮起勞歌
笑攬清溪月
清輝不見多

無姓氏三人

伊州歌二首

樂府集云蓋嘉運開元年中為
兩京節度使時進此詩即所謂

道調也

聞道黃花戍頻年不解兵可憐閨裏月偏照漢家營

其二

諸家選本以此篇作伊州歌按郭君茂倩樂府集無此篇未知孰是

打起黃鶯兒莫教枝上題啼時驚妾夢不得到遼西

須劉

溪云恨恨無極陵陽室中語云大概作詩從首至尾語輒聯屬如有理詞狀此四句可為標準矣

陸州歌第三

香氣傳空蒲粧花映薄紅歌聲天仗外舞態御樓中

排遍第一

樹發花如錦鶯啼柳若絲更逢歡燕地愁見別離時

第三

坐對銀缸曉停流玉筋
痕君門常不見無處謝前恩

西鄙人

哥舒歌

北斗七星高哥舒夜帶刀
至今窺牧馬不敢過臨洮

太上隱者

答人

偶來松樹下高枕石頭眠
山中無歷日寒盡不知年

吳筠

題華山人所居

故人住南郭邀我對芳尊
歡暢日亦暮不知城市喧

別章叟

平昔同一里經年不相思
今日成遠別相對心淒其

以下衲子五人

皎然

待山月

夜夜憶故人長教山月待今宵故人至山月知何在

湖南蘭若

未到無為岸空憐不繫舟東山白雲意歲晚尚悠悠
法華寺望高峰贈如獻上人

峰色秋天見松聲靜夜聞影孤長不在行道入深雲
酬李紓補闕

不住東山寺雲泉處處行近臣那得識禪客本無名

靈澈

遠公墓

古墓石稜稜寒雲晚景凝空悲虎溪月不見鴈門僧

貫休

姓姜字德遠鍾陵人蘭溪和安寺賜紫禪月大師

月夕

霜月夜徘徊樓中羌管催曉風吹不盡江上落殘梅

脩睦

懷故園

故園歸未得此日意何傷獨坐水邊草水流春日長

子蘭

城上吟

古塚密於草新墳侵古道城外無閒地城中人又老

韓氏

以下宮閨八人

題紅葉

詩話云盧僊舍人應舉京師偶臨御溝見一紅葉上有詩云盧得之藏于中

篋及宣宗有旨出宮人許其從人盧獲其人觀紅葉吁怨久之曰當時偶題君乃得之

流水何太急深宮盡日閒殷勤謝紅葉好去到人間

七歲女子

武后時

送兄

唐史遺事云如意中有七歲女子能詩天后令賦別兄詩應聲而成云

別路雲初起離亭葉正飛所嗟人異鴈不作一行歸

湘驛女子

題玉泉溪

紅葉醉秋色碧溪彈夜絃佳期不可再風雨杳如年

侯夫人

自感

粧成多自恨夢好却成悲不及楊花意春來到處飛

郎大家

采桑

春來南鴈歸日去西蠶遠妾思紛何極客遊殊未返

劉采春

囉噴曲五首

不喜秦淮水生憎江上船載兒夫壻去經歲又經年
借問東園柳枯來得幾年自無枝葉分莫怨太陽偏
莫作商人婦金釵當卜錢朝朝江口望錯認幾人船

那年離別日只道往桐廬桐廬人不見今得廣州書
昨日勝今日今年老去年黃河清有日白髮黑無緣

崔氏女

明月三五夜

待月西廂下迎風戶半開拂墻花影動疑是故人來

薛濤

春望詞

花開不同賞花落不同悲欲問相思處花開花落時

六言附

李景伯

回波樂

郭茂倩樂府云商調曲也唐中宗時造蓋出于曲水引流汎觴也

本事詩話云中宗之世嘗因內燕羣臣皆歌回波樂撰辭起舞時沈佺期以罪流嶺表恩還舊官而未復朱紱佺期乃歌回波樂詞以見意中宗即以緋魚賜之自是多求遷擢唐書云景龍中中宗燕侍臣酒酣令各為回波樂衆皆為諂佞之辭及日要榮位次至諫議大夫李景伯乃歌此篇甚有規諷後為舞曲

回波爾時酒卮微臣職在箴規侍燕既過三爵諠譁竊

恐非儀

張說

破陳樂

六言八句 樂苑曰商調曲也唐太宗所造玄宗又作小破陳樂亦舞曲也

漢兵出頓金微照日明光鐵衣
百里火幡煥煥千行雲
騎駢駢跼踏遠河自竭鼓譟
燕山可飛正屬四方朝賀
端知萬舞皇威

王維

田園樂五首

採菱渡頭風急策杖村西日斜
右樹壇邊漁父桃花源裏人家

萋萋芳草春綠落落長松夏寒
牛羊自歸村巷童稚不識衣冠

山下孤煙遠村天邊獨樹高原
一瓢顏回陋巷五柳先生對門

酌酒會臨泉水抱琴好倚長松
南園露葵朝折西舍黃粱夜春

桃紅復含宿雨柳綠更帶朝烟花落家僮未掃鳥啼山

客猶眠

茗溪云每賦桃紅柳綠花落鳥啼之句令人坐想欄川之勝此老傲睨闊適于其間

劉長卿

尋張逸人山居

危石纔通鳥道空山更有人家桃源定在深處澗水浮
來落花

送陸澧還吳中

瓜步寒潮送客楊柳暮雨霑衣故山南望何處秋草連

天獨歸

發越州赴潤州使院留別鮑侍御

對水看山別離孤舟日暮行遲江北江南春草獨向金

陵去時

茗谿訓梁耿別後見寄

六言
八句

清川永路何極落日孤舟解攜鳥向平蕪遠近人隨流
水東西白雲千里萬里明月前谿後谿惆悵長沙謫去

江潭芳草萋萋

張繼

奉寄皇甫冉補闕

京口情人別久揚州估客來
踈潮至潯陽回去相思何
處通書

皇甫冉

送鄭二之茅山

水流絕澗終日草長深山暮
春犬吠雞鳴幾處條桑種
杏何人

小江懷靈一上人

江上年年春草津頭日日人行借問山陰遠近猶聞薄

暮鐘聲

問李二司直所居雲山

門外水流何處天邊樹遶誰家山色東西多少朝朝幾

度雲遮

洪容齋三筆云皇甫冉集中所載張繼奉寄六言詩一首冉酬之而序曰懿孫予之舊好祇役

武昌有六言詩見憶今以七言裁答蓋拙于事者繁而費冉之意以六言難工故行爲七言答之然自又有小江懷靈一上人等三篇皆清絕可畫非拙而不能也予編唐人絕句得七首七十五百首五言二千五百首合

欽定四庫全書

唐詩品彙

為萬首而六言不滿
四十信乎其難也

韓翃

宿甌山

一身趨侍丹墀西路翩翩去時惆悵青山綠水何年更
是來期

送陳明府赴淮南

六言
八句

年華近過清明落日微風送行黃鳥綿蠻芳樹紫騮蹀
躞東城花間一杯促膝煙外千里含情應渡淮南信宿

諸侯擁旆相迎

盧綸

送萬臣

六言
八句

把酒留君聽琴誰堪歲暮離心霜葉無風自落秋雲不
雨空陰人愁荒村路細馬怯寒溪水深望盡青山獨立
更知何處相尋

顧況

歸山

心事數莖白髮生涯一片青山空林有雪相待古道無人獨還

王建

宮中三臺

池北池南草綠殿前殿後花紅天子千秋萬歲未央明月清風

江南三臺

青草湖邊草色飛猿嶺上猿聲萬里湘江客到有風有

雨人行

劉禹錫

答樂天臨都驛見贈

北固山邊波浪東
都城裏風塵世事不同
心事新人何似故人


周賀

送李億東歸

六言
八句

黃山遠隔秦樹紫
禁斜通渭城別路
青青柳發前溪漠

漠花生和風澹蕩歸客落日殷勤早鶯潮上金罇未飲
讌歌已有餘聲



唐詩品彙卷四十五

欽定四庫全書

集部

唐詩品彙卷

四十六至
五十

詳校官檢討_臣德生

助教_臣常循覆勘

總校官進士_臣朱鈐

校對官編修_臣勵守謙

謄錄監生_臣薛夢陽

欽定四庫全書

唐詩品彙卷四十六

明 高棟 編

七言絕句一

正始

許敬宗

奉和聖製餞來濟應詔

按本集乃
七言律詩

萬乘騰鑣警岐路百壺供帳餞離宮御溝分水聲難絕

廣宴留歌曲易終

盧照鄰

登封大酺歌

日觀仙雲乘鳳輦
天門瑞雪照龍衣
繁絃綺席方終夜
妙舞清歌歡未歸

九月九日旅眺

九月九日眺山川
歸心歸望積風煙
他鄉共酌金花酒
萬里同悲鴻雁天

王勃

秋江送別

早是他鄉值早秋
江亭明月帶江流
已覺逝川傷別念
復看津樹隱離舟

蜀中九日

九月九日望鄉臺
他席他鄉送客杯
人情已厭南中苦
鴻鴈那從北地來

喬知之

折楊柳

可憐濯濯春楊柳
攀折將來就織手
妾容共此同盛衰
何必君恩獨能久

杜審言

渡湘江

遲日園林悲昔遊
今春花鳥作邊愁
獨憐京國人南竄
不似湘江水北流

贈蘇綰書記

知君書記本翩翩為許從戎赴朔邊
紅粉樓中應計日燕支山下莫經年

劉庭琦

銅雀臺

銅臺宮觀委灰塵魏主園陵漳水濱
即今西望猶堪思況復當時歌舞人

沈佺期

夜宴安樂公主宅

濯龍門外主家親鳴鳳樓中天上人自有金盃迎甲夜
還將綺席代陽春

奉和聖製韋嗣立莊應制

東山朝日翠屏開北闕晴空綵仗來喜遇天文七曜動
少微今夜入三台

苑中遇雪應制

北闕彤雲掩曙霞東風吹雪舞仙家瓊章定少千人和
銀樹長芳六出花

邛山

北邙山上列墳塋萬古千秋對洛城
城中日夕歌鐘起
山上唯聞松栢聲

宋之問

苑中遇雪應制

紫禁仙輿詰旦來青旂遙倚望春臺
不知庭霰今朝落
疑是林花昨夜開

送司馬道士遊天台

羽客笙歌此地違
離筵數處白雲飛
蓬萊闕下長相憶
桐栢山頭去不歸

李嶠

奉和聖製韋嗣立莊應制

萬騎千官擁帝車
八龍三馬訪仙家
鳳凰原上窺青壁
鸚鵡杯中弄紫霞

遊苑遇雪

散漫祥雲逐聖迴
飄飄瑞雪繞天來
不能落後爭飛絮

故欲迎前定早梅

李又

夜宴安樂公主宅

牽牛南渡象昭回學鳳樓成帝女來
平旦鵲鸞歌舞席
方宵鸚鵡獻酬杯

奉和聖製韋韋嗣立莊應制

曲榭回廊繞澗幽飛泉瀆水溢池流
祇應感發明王夢
遂得邀迎聖主遊

徐彥伯

上巳日祓禊渭濱應制

晴風麗日滿芳洲
柳色春筵祓錦流
皆言侍蹕橫汾燕
暫似乘查天漢遊

餞唐永昌

金谿碧水玉潭沙
鳬鳥翩翩弄日華
鬪鷄香陌行春倦
為摘東園桃李花

岑羲

夜宴安樂公主宅

金榜重樓開夜扉
瓊筵愛客未言歸
銜歡不覺銀河曉
盡醉那知玉漏稀

劉憲

苑中遇雪應制

龍驂曉入望春宮
正逢春雪舞東風
花光併灑天文上
寒氣行消御酒中

趙彥昭

奉和聖製幸韋嗣立莊應制

廊廟心存巖壑中
鑾輿矚在灞城東
逍遙自有蒙莊子

漢主徒言河上公

李適

餞唐永昌

聞道飛鳧向洛陽
翩翩矯翮度文昌
因聲寄意三花樹

少室巖前幾過香

徐堅

餞唐永昌

郎官出宰赴伊瀍
征傳駸駸灞水前
此時悵望新豐道
握手相看共黯然

馬懷素

餞唐永昌

聞君出宰洛陽隅
賓友稱觴餞路衢
別後相思在何處
祇應闕下望仙鳧

武平一

夜宴安樂公主宅

王孫帝女下仙臺
金榜珠簾入夜開
遽惜瓊筵歡正洽
唯愁銀箭曉相催

奉和聖製韋嗣立莊應制

鳴鑾奕奕下重樓
羽蓋逍遙向一丘
漢日唯聞白衣寵
唐年更覩赤松遊

蘇頌題

夜宴安樂公主宅

車如流水馬如龍
仙史高臺十二重
天上初移衡漢匹
可憐歌舞夜相從

奉和聖製幸韋嗣立莊應制

樹色參差隱翠微
泉流百尺向空飛
傳聞此處投竿住
遂使茲辰扈蹕歸

張說

十五夜御前踏歌詞

華萼樓前雨露新
長安城裏太平人
龍銜火樹千燈艷

雞上蓮花萬歲春

上巳日祓禊渭濱應制

青郊上巳艷陽年
紫禁皇遊祓渭川
幸得歡娛承湛露
心同草樹樂春天

奉和聖製同玉真公主遊大哥山池應制

池如明鏡月華開
山學香爐雲氣來
神藻飛為鵲鷁賦
仙聲颺出鳳凰臺

送梁六

巴陵一望洞庭秋，日見孤峰水上浮。
聞道神仙不可接，心隨湖水共悠悠。

汎洞庭

平湖一望上連天，秋景千尋下洞泉。
忽驚水上江華滿，疑是乘舟到日邊。

賀知章

採蓮曲

稽山罷霧鬱嵯峨，鏡水無風也自波。
莫言春度芳菲盡，

別有中流採芰荷

回鄉偶書二首

少小離鄉老大回鄉音無改鬢毛衰
兒童相見不相識

笑問客從何處來

劉云說透人情之的

離別家鄉歲月多近來人事半消磨
唯有門前鏡湖水
春風不改舊時波

王翰

涼州詞二首

蒲桃美酒夜光杯欲飲琵琶馬上催
醉卧沙場君莫笑古來征戰幾人回

秦中花鳥已應闌塞外風沙猶自寒
夜聽胡笳折楊柳教人氣盡憶長安

玄宗皇帝

過大哥山池

澄潭皎鏡石崔嵬萬壑千巖暗綠苔
林亭自有幽真趣況復秋深爽氣來

唐詩品彙卷四十六

欽定四庫全書

唐詩品彙卷四十七

明 高棅 編

七言絕句二

正宗

李白

清平調詞三首

雲想衣裳花想容
春風拂檻露華濃
若非羣玉山頭見

會向瑤臺月下逢

一枝濃艷露凝香
雲雨巫山枉斷腸
借問漢宮誰得似
可憐飛燕倚新粧

名花傾國兩相歡
長得君王帶笑看
解釋春風無限恨
沈香亭北倚闌干

長門怨二首

天迴北斗挂西樓
金屋無人螢火流
月光欲到長門殿
別作深宮一段愁

桂殿長愁不記春黃金四屋起秋塵夜懸明鏡青天上
獨照長門宮裏人

少年行

五陵年少金市東銀鞍白馬度春風落花踏盡遊何處

笑入胡姬酒肆中

劉云語氣凌厲
快活夢亦難忘

橫江詞

橫江館前津吏迎向余東指海雲生郎今欲渡緣何事

如此風波不可行

范德機云絕句一句一絕乃其大本
其次句少意多極四咏而反覆議論

此篇氣格合歌行之風使人嗟嘆有無窮之思此唐人所長也諸家詩非不佳然視李杜氣格音調特異熟讀

當見

客中行

蘭陵美酒鬱金香
玉碗盛來琥珀光
但使主人能醉客
不知何處是他鄉

蛾眉山月歌

蛾眉山月半輪秋
影入平羌江水流
夜發清谿向三峽

思君不見下渝州

劉須溪云含情悽婉
有竹枝縹渺之音

永王東巡歌五首

永王正月東出師
天子遙分龍虎旗
樓船一舉風波靜
江漢翻為鴈鷺池

三川北虜亂如麻
四海南奔似永嘉
但用東山謝安石
為君談笑靜胡沙

丹陽北固是吳關
畫出樓臺雲水間
千巖烽火連滄海
兩岸旌旗繞碧山

帝寵賢王入楚關
掃清江漢始應還
初從雲夢開朱邸

更取金陵作小山

試借君王玉馬鞭指揮戎虜坐瓊筵南風一掃胡塵靜
西入長安到日邊

上皇西巡南京歌四首

誰道君王行路難六龍西幸萬人歡地轉錦江成渭水
天迴玉壘作長安

萬國同風共一時錦江何謝曲江池石鏡更明天上月
後宮親得照蛾眉

華陽春樹號新豐
行入新都若舊宮
柳色未饒秦地綠
花光不減上陽紅

劍閣重關蜀北門
上皇歸馬若雲屯
少帝長安開紫極
重懸日月照乾坤

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

贈汪倫

李白乘舟將欲行忽聞岸上踏歌聲桃花潭水深千尺

不及汪倫送我情

范云此非必其詩之佳要見古人風致如此

聞王昌齡左遷龍標尉遙有此寄

楊花落盡子規啼聞道龍標過五谿我寄愁心與明月

隨風直到夜郎西

黃鶴樓送孟浩然之廣陵

故人西辭黃鶴樓烟花三月下揚州孤帆遠影碧空盡

唯見長江天際流

山中問答

問余何事棲碧山笑而不答心自閒
桃花流水杳然去別有天地非人間

東魯門汎舟

日落沙明天倒開波搖石動水縈迴
輕舟汎月尋谿轉疑是山陰雪後來

陪族叔邢部侍郎曄及中書舍人賈至遊洞庭
湖三首

洞庭西望楚江分水盡南天不見雲日落長沙秋色遠

不知何處弔湘君

劉云其所長在此
他人必不能及也

南湖秋水夜無烟耐可乘流直上天且就洞庭賒月色
將船買酒白雲邊

洞庭湖西秋月輝瀟湘江北早鴻飛醉客滿船歌白紵

不知霜露濕秋衣

劉云自
是悲壯

望廬山瀑布水

日照香爐生紫烟遙看瀑布挂前川飛流直下三千尺

疑是銀河落半天

劉云以為銀河
猶未免俗耳

登廬山五老峰

廬山東南五老峰
青天削出金芙蓉
九江秀色可攬結
吾將此地巢雲松

望天門山

天門中斷楚江開
碧水東流至北迴
兩岸青山相對出
孤帆一片日邊來

早發白帝城

朝辭白帝綵雲間千里江陵一日還兩岸猿聲啼不住
輕舟已過萬重山

秋下荆門

霜落荆門江樹空布帆無恙挂秋風此行不為鱸魚膾
自愛名山入剡中

蘇臺覽古

舊苑荒臺楊柳新菱歌清唱不勝春只今惟有西江月
曾照吳王宮裏人

越中覽古

越王勾踐破吳歸義士還家盡錦衣
宮女如花滿春殿
只今唯有鷓鴣飛

與史郎中欽聽黃鶴樓上吹笛

一為遷客去長沙西望長安不見家
黃鶴樓中吹玉笛
江城五月落梅花

春夜洛城聞笛

誰家玉笛暗飛聲散入春風滿洛城
此夜曲中聞折柳

何人不起故園情

陌上贈美人

駿馬驕行踏落花
垂鞭直拂五雲車
美人一笑褰珠箔
遙指紅樓是妾家

口號吳王美人半醉

風動荷花水殿香
姑蘇臺上見吳王
西施醉舞嬌無力
笑倚東窗白玉牀

南流夜郎寄內

夜郎天外怨離居
明月樓中音信疎
北鴈春歸看欲盡
南來不得豫章書

王昌齡

春宮曲

昨夜風開露井桃
未央前殿月輪高
平陽歌舞新承寵
簾外春寒賜錦袍

西宮春怨

西宮夜靜百花香
欲捲珠簾春恨長
斜抱雲和深見月

朧朧樹色隱昭陽

西宮秋怨

芙蓉不及美人粧
水殿風來珠翠香
却恨含情掩秋扇
空懸明月待君王

長信秋詞三首

金井梧桐秋葉黃
珠簾不捲夜來霜
熏籠玉枕無顏色
卧聽南宮清漏長

奉帚平明金殿開
且將團扇暫徘徊
玉顏不及寒鴉色

猶帶昭陽日影來

謝疊山云此篇怨而不怒有風人之義

真成薄命久尋思
夢見君王覺後疑
火照西宮知夜飲
分明複道奉恩時

青樓曲二首

白馬金鞍從武皇
旌旗十萬宿長楊
樓頭少婦鳴箏坐
遙見飛塵入建章

馳道楊花滿御溝
紅粧謾綰上青樓
金章紫綬千餘騎
夫婿朝回初拜侯

青樓怨

香幃風動花入樓高調鳴箏緩夜愁腸斷關山不解說
依依殘月下簾鉤

閨怨

閨中少婦不知愁春日凝粧上翠樓忽見陌頭楊柳色
悔教夫婿覓封侯

謝云見蟲鳴螽躍而未見君子則憂見采薇采蕨而未見君子則憂

之榮華禽虫之和樂皆能動人傷悲之心此詩謂閨中少婦初不識愁春日登樓見楊柳之青青始知陽和發育萬物皆春吾與良人徒有功名之望今日空閨獨處良人辛苦戎事曾不如草木羣生各得其樂於是而悔

望此功名此亦
本人情而言也

采蓮曲二首

荷葉羅裙一色裁
芙蓉向臉兩邊開
亂入池中看不見
聞歌始覺有人來

吳姬越艷楚王妃
爭弄蓮花水濕衣
來時浦口花迎入
采罷江頭月送歸

出塞行

白花原頭望京師
黃河水流無盡時
秋天曠野行人絕

馬首東來知是誰

從軍行五首

烽火城西百尺樓
黃昏獨坐海風秋
更吹羌笛關山月
無那金閨萬里愁

琵琶起舞換新聲
總是關山離別情
撩亂邊愁聽不盡
高高秋月照長城

青海長雲暗雪山
孤城遙望玉門關
黃沙百戰穿金甲
不破樓蘭終不還

秦時明月漢時關萬里長征人未還但使龍城飛將在
不教胡馬度陰山

大漠風塵日色昏紅旗半卷出轅門前軍夜戰洮河北
已報生擒吐谷渾

甘泉歌

乘輿執玉已登壇細草沾衣春殿寒昨夜雲生初拜月
萬年甘露水精盤

蕭駙馬花燭

青鸞飛入合歡宮
紫鳳銜花出禁中
可憐今夜千門裏
銀漢星回一道通

觀獵

角鷹初下秋草稀
鐵驄拋鞍去如飛
少年獵得平原兔
馬上橫鞘意氣歸

梁苑

梁園秋竹古時煙
城外風悲欲暮天
萬乘旌旗何處在
平臺賓客有誰憐

李倉曹宅夜飲

霜天留飲故情歡
銀燭金爐夜不寒
欲問吳江別來意
青山明月夢中看

宴春源

源向春城花幾重
江明深翠引諸峰
與君醉入松谿路
山館寥寥傳暝鐘

龍標墅宴

沅谿夏晚足涼風
春酒相攜就竹叢
莫道絃歌愁遠謫

青山明月不曾空

寄穆侍御出幽州

一從恩譴度瀟湘塞北江南萬里長
莫道薊門書信少鴈飛猶得到衡陽

送柴侍御

沅水通流接武岡送君不覺有離傷
青山一道同雲雨明月何曾是兩鄉

送李五

玉盃金鑿傾送君江西日
入起黃雲扁舟乘月暫來去
誰道滄浪吳楚分

送人歸江夏

寒江綠水楚雲深
莫道離憂遠
心曉夕雙帆歸鄂渚
愁將孤月夢中尋

芙蓉樓送辛漸二首

寒雨連江夜入吳
平明送客楚山孤
洛陽親友如相問
一片冰心在玉壺

丹陽城南秋海陰
丹陽城北楚雲深
高樓送客不能醉
寂寂寒江明月心

送薛大赴安陸

津頭雲雨暗湘山
遷客離憂楚地顏
遙送扁舟安陸郡
天邊何處穆陵關

送別魏二

醉別江樓橘柚香
江風引雨入船涼
憶君遙在瀟湘月
愁聽清猿夢裏長

別辛漸

別館蕭條風雨寒
扁舟月色渡江看
酒酣不識關西道
卻望春江雲尚殘

盧谿別人

武陵谿口駐扁舟
谿水隨君向北流
行到荆門上三峽
莫將孤月對猿愁

重別李評事

莫道秋江離別難
舟船明日是長安
吳姬緩舞留君醉

隨意青楓白露寒

別陶副使歸南海

南越歸人夢海樓
廣陵新月海亭秋
寶刀留贈長相憶
當取戈船萬戶侯

別李浦之京

故園今在灞陵西
江畔逢君醉不迷
小弟鄰莊尚漁獵
一封書寄數行啼

題朱鍊師山房

叩齒焚香出世塵
齋壇鳴磬步虛人
百花仙醞能留客
一飯胡麻度幾春

送朱越

遠別舟中蔣山莫
君行舉首燕城路
薊門秋月隱黃雲
期向金陵醉江樹

送姚司法歸吳

吳掾留觴楚郡心
洞庭秋雨海門陰
但令意遠扁舟送
不道滄江百丈深

西江寄越弟

南浦逢君嶺外還
沅谿更遠洞庭山
堯時恩澤如春雨
夢裏相逢共入關

唐詩品彙卷四十七

欽定四庫全書

唐詩品彙卷四十八

明 高棟 編

七言絕句三

羽翼

王維

少年行二首

新豈美酒斗十千
咸陽遊俠多少年
相逢意氣為君飲

繫馬高樓垂柳邊

出身仕漢羽林郎
初隨驃騎戰漁陽
孰知不向邊庭苦
縱死猶聞俠骨香

寄河上段十六

與君相見即相親
聞道君家在孟津
為見行舟試借問
客中時有洛陽人

劉云容易盡
情舊未有比

九月九日憶山東兄弟

獨在異鄉為異客
每逢佳節倍思親
遙知兄弟登高處

遍挿茱萸少一人

與盧員外象過崔處士興宗林亭

綠樹重陰蓋四鄰
青苔日厚自無塵
科頭箕踞長松下
白眼看他世上人

送元二使安西

渭城朝雨裊輕塵
客舍青青柳色新
勸君更盡一杯酒

西出陽關無故人

謝疊山云唐人餞別必歌陽關三疊此詩後兩句謂勸君更盡此酒出陽

關之外必求今日故人

飲酒之樂不可得矣

送別

送君南浦淚如絲
君向東州使我悲
為報故人憔悴盡
如今不似洛陽時

送韋評事

欲逐將軍取右賢
沙場走馬向居延
遙知漢使蕭關外
愁見孤城落日邊

送沈子福之江東

楊柳渡頭行客稀
呂師盪漿向臨圻
唯有相思似春色

江南江北送君歸

寒食記上作

廣武城邊逢暮春
汶陽歸客淚沾巾
落花寂寂啼山鳥
楊柳青青渡水人

戲題盤石

可憐盤石臨泉水
復有垂楊拂酒盃
若道春風不解意

何因吹送落花來

劉云送蕩
野興甚濃

私成口號誦示裴迪

維時為給事中
賊陷京師為所擒
維吞藥伴瘖祿山

愛其才逼至洛陽供舊賦拘於菩提寺裴廵來
相看說逆賊等宴凝碧池上作音樂梨園供奉
等舉聲便一時淚下維痛悼賦此詩以示迪詩
後聞于行在平賊後授偽官者皆定罪獨維得
免

萬戶傷心生野煙百官何日更朝天
秋槐葉落空宮裏凝碧池頭奏管絃

賈至

出塞曲

萬里平沙一聚塵南飛羽檄北來人
傳道五原烽火急

單于昨夜寇新秦

春思二首

草色青青柳色黃
桃花歷亂李花香
東風不為吹愁去
春日偏能惹恨長

紅粉當壚弱柳垂
金花臘酒解酴醾
笙歌日暮能留客
醉殺長安輕薄兒

勤政樓觀樂

銀河帝女下三清
紫禁笙歌出九城
為報延州來聽樂

金方里人言
須知天下欲昇平

西亭春望

日長風暖柳青青
北鴈歸飛入窅冥
岳陽城上聞吹笛
能使春心滿洞庭

初至巴陵與李十二白同汎洞庭湖二首

江上相逢皆舊遊
湘山永望不堪愁
明月秋風洞庭水
孤鴻落葉一扁舟

楓岸紛紛落葉多
洞庭秋水晚來波
乘興輕舟無近遠

白雲明月弔湘娥

答嚴大夫

今夕秦天一鴈來
梧桐墜葉擣衣催
思君獨步華庭月
舊館秋陰生綠苔

送南給事貶崖州

疇昔丹墀與鳳池
即今相見兩相悲
朱崖雲夢三千里
欲別俱為慟哭時

送李侍郎赴常州

雪晴雲散北風寒
楚水吳山道路難
今日送君須盡醉
明朝相憶路漫漫

謝疊山云今日送君而不盡醉明朝兩地相望欲如今日之歡不可得也

洞庭送李十二赴零陵

今日相逢落葉前
洞庭秋水遠連天
共說京華舊遊處
回看北斗欲潛然

江南送李卿

雙鶴南飛度楚山
楚南相見憶秦關
願值回風吹羽翼
早隨陽鴈及春還

送王道士還京

一片仙雲入帝鄉
數聲秋鴈至衡陽
借問清都舊花月
豈知遷客泣瀟湘

巴陵夜別王八員外

柳絮飛時別洛陽
梅花發後在三湘
世情已逐浮雲散
離恨空隨江水長

岳陽樓重宴別王八員外貶長沙

江路東連千里潮
青雲北望紫微遙
莫道巴陵湖水濶

長沙南畔更蕭條

岑參

封大夫破播仙凱歌四章

漢將承恩西破戎
捷書先奏未央宮
天子預開麟閣待
祇今誰數貳師功

官軍西出過樓蘭
營幕傍臨月窟寒
蒲海曉霜凝馬尾
蔥山夜雪撲旌竿

鳴笳疊鼓擁回軍
破國平蕃昔未聞
丈夫鵲印搖邊月

大將龍旂掣海雲

日落轅門鼓角鳴
千羣面縛出蕃城
洗兵魚海雲迎陣
秣馬龍堆月照營

苜蓿峰寄家人

苜蓿峰邊逢立春
胡蘆河上淚沾巾
閨中只是空相憶
不見沙場愁殺人

玉關寄長安主簿

東去長安萬里餘
故人那惜一行書
玉關西望腸堪斷

況復明朝是歲除

逢入京使

故園東望路漫漫雙袖龍鍾淚不乾馬上相逢無紙筆

憑君傳語報平安

劉云
辭達

磧中作

走馬西來欲到天辭家見月兩回圓今夜不知何處宿
平沙萬里絕人煙

虢州後亭送李判官使赴晉絳

得秋
字

西原驛路掛城頭客散江亭雨未休君去試看汾水上

白雲猶似漢時秋

謝疊山云此詩為去國者作末句隱然富貴不足道漢公卿往來汾陰不

知幾人在唯白雲似漢時秋耳所以開廣其襟懷鬱抑也

原頭送范侍御

百尺原頭酒色殷路傍驄馬汗班班別君只有相思夢

遶莫千山與萬山

崔倉曹席上送殷寅充右相判官赴淮南

清淮無底綠江深宿處津亭楓樹林駟馬欲辭丞相府

一樽須盡故人心

送李明府赴睦州謁太夫人

手把銅章望海雲夫人堂上絳羅裙嚴灘一點舟中月

萬里煙波也勞君

夢一作夢

送人還京

足馬西從天外歸揚鞭只共鳥爭飛送君九月交河北
雪裏題詩淚滿衣

草堂村尋人不遇

數株垂柳欲依依
深巷斜陽暮鳥飛
門前雪滿無行跡
應是先生出未歸

赴北庭度隴思家

西向輪臺萬里餘
也知鄉信日應疏
隴山鸚鵡能知語
為報家人數寄書

春夢

洞房昨夜春風起
遙憶美人湘江水
枕上片時春夢中
行盡江南數千里

過燕支寄杜位

燕支山西酒泉道北風吹沙卷白草
長安遙在日光邊
憶君不見令人老

酒泉太守席上醉後作

酒泉太守能劍舞高堂置酒夜擊鼓
胡笳一曲斷人腸
坐客相看淚如雨

送劉判官赴磧西

火山五月人行少看君馬去疾如鳥
都使行營太白西

角聲一動胡天曉

山房春事

梁園日暮亂飛鴉
極目蕭條三兩家
庭樹不知人去盡
春來還發舊時花

儲光義

明妃詞三首

西行隴上泣胡天
南向雲中指渭川
毳幕夜來時宛轉
何由得似漢王邊

胡王知妾不勝悲樂府皆傳漢國辭朝來馬上瑩篴引
稍似宮中閒夜時

日暮驚沙亂雪飛傍人相勸易羅衣強來前殿看歌舞
共待單于夜獵歸

同金壇令武平一遊湖三首

朝來仙閣聽絃歌暝入花亭見綺羅池邊命酒憐風采
浦口回船惜芰荷

朦朧竹影蔽巖扉淡蕩荷風飄舞衣舟尋綠水宵將半

月隱青林人未歸

花潭竹嶼傍幽蹊
畫楫浮空入夜谿
菱荷覆水船難進
歌舞留人月易低

題茅山華陽洞

華陽洞口片雲飛
細雨濛濛欲濕衣
玉簫遍滿仙壇上
應是茅家兄弟歸

寄孫山人

新林二月孤舟還
水滿清江花滿山
借問故園隱君子

時時來往往人間

杜甫

漫興

懶漫無堪不出村
呼兒自在掩柴門
蒼苔濁酒林中靜

碧水春風野外昏

劉云善自
遣如此

贈花卿

錦城絲管日紛紛
半入江風半入雲
此曲祇應天上有

人間能得幾回聞

贈鄭鍊赴襄陽

鄭子將行罷使臣囊無一物獻尊親
江山路遠羈離日裘馬誰為感激人

奉和嚴國公軍城早秋

秋風嫋嫋動高旌玉帳分弓射虜營
已收滴博雲間戍更奪蓬婆雪外城

解悶

一辭故國十經秋每見秋瓜憶故丘
今日南湖采薇蕨

何人為覓鄭瓜州

宮池春鴈

青春欲盡急還鄉
紫塞寧論尚有霜
翅在雲天終不遠
力微繒繳絕須防

書堂飲既夜復邀李尚書下馬月下賦絕句

湖月林風相與清
殘樽下馬復同傾
久拚野鶴如霜鬢

遮莫鄰雞下五更

藝苑雌黃云遮莫蓋
但語猶言儘教也

常建

塞下曲四首

玉帛朝回望帝鄉
烏孫歸去不稱王
天涯靜處無征戰
兵氣銷為日月光

北海陰風動地來
明君祠上望龍堆
髑髏皆是長城卒
日暮沙場飛作灰

龍鬬雌雄勢已分
山崩鬼哭恨將軍
黃河直北千餘里
冤氣蒼茫成黑雲

因嫁單于怨在邊
蛾眉萬古葬胡天
漢家此去三千里

青塚常無草木煙

塞下

鐵馬胡裘出漢營
分麾百道救龍城
左賢未遁旌竿折
過在將軍不在兵

送宇文六

花映垂楊漢水清
微風林裏一枝輕
即今江北還如此
愁殺江南離別情

三日尋李九莊

雨歇楊林東渡頭
永和三日盪輕舟
故人家在桃花岸
直到門前谿水流

嶺猿

裊裊淒淒清且切
鷓鴣飛處又斜陽
相思嶺上相思淚
不到三聲合斷腸

高適

營州歌

營州少年厭原野
皮裘蒙茸獵城下
虜酒千鍾不醉人

胡兒十歲能騎馬

劉云
高古

九曲詞

鐵騎橫行鐵嶺頭西看邏逤取封侯青海只今將飲馬

黃河不用更防秋

除夜作

旅館寒燈獨不眠客心何事轉愴然故鄉今夜思千里

愁鬢明朝又一年

謝疊山云客中除夜
間此詩者無不悽然

塞上聽吹笛

雪淨胡天牧馬還
月明羌笛戍樓間
借問梅花何處落
風吹一夜滿關山

別董大

十里黃雲白日曛
北風吹鴈雪紛紛
莫愁前路無知己
天下誰人不識君

孟浩然

濟江問舟子

潮落江平未有風
輕舟共濟與君同
時時引領望天末

何處青山是越中

送杜十四之江南

荆吳相接水為鄉
君去春江正淼茫
日暮孤舟何處泊
天涯一望斷人腸

李頎

遇劉五

洛陽一別梨花新
黃鳥飛飛逢故人
攜手當年共為樂
無驚蕙草惜殘春

寄韓鵬

為政心閒物自閒
朝看飛鳥暮飛還
寄書河上神明宰
羨爾城頭姑射山

崔國輔

白紵辭

洛陽梨花落如霰
河陽桃葉生復齊
恐坐玉樓春欲盡
紅綿粉絮裛粧啼

九日

江邊楓落菊花黃
少長登高一望鄉
九日陶家雖載酒
三年楚客已沾裳

張謂

題長安主人壁

世人結交須黃金
黃金不多交不深
縱令然諾暫相與
終是悠悠行路心

送人使河源

故人役役向邊州
四馬今朝不少留
長路關山何日盡

滿堂絲竹為君愁

王之渙

涼州詞

黃河遠上白雲間一片孤城萬仞山羌笛何須怨楊柳

春光不度玉門關

劉云得誠齋評看更佳

九日送別

薊庭蕭瑟故人稀何處登高且送歸今日暫同芳菊酒

明朝應作斷蓬飛

綦毋潛

過上人蘭若

山頭禪室掛僧衣
牕外無人谿鳥飛
黃昏半在山下路
却聽鐘聲連翠微

薛據

落第後口號

一作綦毋潛詩

十五能文西入秦
三十無家作路人
時命不將明主合
布衣空惹洛陽塵

蔡希寂

洛陽客舍逢祖詠留宴

綿綿鐘漏洛陽城客舍貧居絕送迎
逢君貰酒因成醉醉後焉知世上情

沈頌

衛中作

衛風愉艷宜春色淇水清冷增暮愁
縱使榴花能一醉終須萱草暫忘憂

張偶

辭房相公

秋風颯颯雨霏霏
愁殺栖遑一布衣
辭君且作隨陽鴈
海內無家何處歸

吳象之

少年行

承恩借獵小平津
使氣常遊中貴人
一擲千金渾是膽
家無四壁不知貧

張潮

採蓮詞

朝出沙頭日正紅
晚來雲起半江中
賴逢鄰女曾相識
並著蓮舟不畏風

江南行

茨菰葉爛別西灣
蓮子花開猶未還
妾夢不離江上水
人傳郎在鳳凰山

元結

欸乃曲

大厯初結為道州刺史以軍事詣都使還州逢春水舟行不進乃作此曲令舟

子唱之以取適於道路云宋黃山谷云欸乃音媼霽湘中節歌聲演繁露云柳子厚欸乃一聲山水綠世固共傳欸乃為歌不知何調也元次山欸乃曲五章全是絕句如竹枝之類其謂欸乃者殆舟人于歌聲之外別出一聲以互相其歌也耶柳枝竹枝尚有存者其語度與絕句無異但于句末隨加枝竹或柳枝等語遂即其語以名其歌欸乃殆其例耳

千里楓林煙雨深無朝無暮有猿吟
停橈靜聽曲中意
好是雲山韶濩音

其二

湘江三月春水平滿月和風宜夜行
唱橈欲過平陽戍
守吏相呼問姓名

嚴武

軍城早秋

昨夜秋風入漢關
朔雲邊月滿西山
更催飛將追騎虜
莫遣沙場匹馬還

李華

春行寄興

宜陽城下草萋萋
澗水東流復向西
芳樹無人花自落
春山一路鳥空啼

獨孤及

和韋郎中尋楊駙馬不遇

金屋瓊臺蕭史家
暮春三月渭川花
到君仙洞不相見
謂已吹簫乘早霞

海上憶洛中舊遊

涼風臺上三峰月
不夜城邊萬里沙
離別莫言關塞遠

夢魂長在子陵家

唐詩品彙卷四十八

欽定四庫全書

唐詩品彙卷四十九

明 高棅 編

七言絕句四

接武

上之一

劉長卿

昭陽曲

昨夜承恩宿未央
羅衣猶帶御爐香
芙蓉帳小雲屏暗

楊柳風多水殿涼

重送裴郎中貶吉州

猿啼客散暮江頭
人自傷心水自流
同作逐臣君更遠
青山萬里一孤舟

七里灘送嚴維

秋江渺渺水空波
越客孤舟欲傍歌
手折衰楊悲老大
故人零落已無多

送李判官之潤州行營

萬里辭家事鼓聲金陵驛路楚雲西江村不肯留行客
草色青青送馬蹄

送劉萱之道州謁崔大夫

沅水悠悠湘水春臨岐一望一沾巾
信陵門下三千客君到長沙見幾人

瓜州驛重送梁郎中赴吉州

渺渺雲山去幾重依依獨聽廣陵鐘
明朝借問南來客五馬雙旌何處逢

重送道標上人

衡陽千里去人稀
遙逐孤雲入翠微
春草青青新覆地
深山無路若為歸

寄許尊師

獨上雲梯入翠微
濛濛煙雨映巖扉
世人知在中峰裏
遙禮青山恨不歸

寄別朱拾遺

天書遠召滄浪客
幾度臨岐病未能
江海茫茫春欲遍

行人一騎發金陵

贈秦系

向風長嘯戴紗巾
野鶴由來不可親
明日東歸變名姓
五湖烟水覓何人

使還七里灘上逢薛承規赴江西貶

遷客歸人醉晚寒
孤舟暫泊子陵灘
憐君更去三千里
落日青山江上看

贈崔九

憐君一見一悲歌
歲歲無如老去何
白屋漸看秋草沒
青雲莫道故人多

酬李穆見寄

孤舟相訪至天涯
萬轉雲山路更賒
欲掃柴門迎遠客

青苔黃葉滿貧家

劉後村詩語云魏
野林通不能及也

過鄭山人所居

寂寂孤鶯啼杏園
寥寥一犬吠桃源
落花芳草無尋處
萬壑千峰獨閉門

尋盛禪師蘭若

秋草黃花覆古阡，隔林何處起人烟。
山僧獨在山中老，

唯有寒松見少年。

劉云
淒婉

奉使鄂渚至烏江道中

滄洲不復戀漁竿，白髮那堪帶鐵冠。
客路向南何處是，蘆花十里雪漫漫。

新息道中

蕭條獨向汝南行，客路多逢漢騎營。
古木蒼蒼離亂後，

幾家同住一孤城

家園瓜熟是故蕭相公所遺瓜種悽然感舊因

賦此詩

事去人亡跡自留黃花綠帶不勝愁誰能更向青門外
秋草茫茫覓故侯

錢起

校獵曲

長楊殺氣連雲飛漢主親畋正掩圍重門日晏紅塵出

數騎胡人獵獸歸

過故洛城

故城門前春日斜
故城門裏無人家
市朝欲認不知處
漠漠野田空草花

歸鴈

瀟湘何事等閒回
水碧沙明兩岸苔
二十五絃彈夜月
不勝清怨却飛來

訪李卿不遇

畫戟朱樓映晚霞
高門寒柳度飛鴉
門前不見歸軒至
城上愁看落日霞

暮春歸故山草堂

谷口春殘黃鳥稀
辛夷花盡杏花飛
始憐幽竹山牕下

不改清陰待我歸

謝疊山云春光欲盡鶯老花殘獨山牕幽竹不改清陰如待主人之歸此

與歲寒然後知松栢柏之後凋之意同

送歐陽子還江華郡

江華勝事接湘濱
千里湖山人興新
才子思歸催去棹

汀花且為駐殘春

送崔山人歸山

東山殘雨掛斜暉
野客巢由指翠微
別酒稍酣乘興去
知君不羨白雲歸

秋夜送趙洵歸襄陽

斗酒忘言良夜深
紅螢露滴鵲驚林
欲知別後思今夕
漢水東流是寸心

題禮上人壁畫山水

連山畫出映禪扉
粉壁香筵滿翠微
坐來爐氣縈空散
共指晴雲向嶺歸

晚過橫瀾寄張藍田

亂水東流落照時
黃花滿徑客行遲
林端忽見南山色
馬上還吟陶令詩

韋應物

登樓寄王卿

踏閣攀林恨不同
楚雲滄海思無窮
數家砧杵秋山下

一郡荆榛寒雨中

劉云高視城邑真復如此開合野興甚濃正是絕意復增兩聯即情味不

復如此

登寶意寺上方舊遊

翠嶺香臺出半天萬家烟樹滿晴川諸僧近住不相識

坐聽微鐘記往年

劉云凡語言天趣皆實
歷無趣者雖有味亦短

寒食寄京師諸弟

雨中禁火空齋冷江上流鶯獨坐聽把酒看花想諸弟
杜陵寒食草青青

縣內閒居贈溫公

滿郭春風嵐已昏
鴉栖吏散掩重門
雖居世網常清淨
夜對高僧無一言

賦得沙際路送從叔象

獨樹沙邊人跡稀
欲行愁遠暮鐘時
野泉幾處侵應盡
不過山僧知問誰

九日

今朝把酒復惆悵
憶在杜陵田舍時
明年九月知何處

世難還家未有期

劉云可悲隔世與余同患

答東林道士

紫閣西邊第幾峰
茅齋夜雪虎行蹤
遙看黛色知何處
欲出山門尋暮鐘

閒居寄人

山明野寺曉鐘微
雪滿幽林人跡稀
閒居寥落生高興
無事風塵獨不歸

春思

野花如雪繞江城坐見年芳憶帝京閭闔曉開凝碧樹
曾陪鴛鴦聽流鶯

滁州西澗

獨憐幽草澗邊生上有黃鸝深樹鳴春潮帶雨晚來急

野渡無人舟自橫

歐陽子云滁州城西乃是豐山無西澗獨城北有一澗水極淺不勝舟又

江湖不到豈詩人務在佳句而實無此景耶 謝疊山云幽草黃鸝比君子在野小人在位春潮帶雨晚來急乃季世危難多如日之已晚不復光明也未句謂寬閒寂寞之嘆必有賢人如孤舟之橫渡者特君不能用耳此詩人感時多故而作也何必滁之果如是也 劉云此語自好但韋公體出數字神情又別故貴知言不然

不免為野人語矣好詩必是拾得此絕
先得後半起更難似故知作者用心

子規啼

高林滴露夏夜清南山子規啼一聲鄰家孀婦抱兒泣
我獨展轉何為情

因省風俗訪道士姪不見題壁

去年澗水今亦流去年杏花今又拆山人歸來問是誰
還是去年行春客

皇甫冉

送魏十六還蘇州

秋夜沈沈此送君
陰蟲切切不堪聞
歸舟明日昆陵道
回首姑蘇是白雲

同李萬晚望南岳寺懷普門上人

釋子身心無垢紛
獨將衣鉢去人羣
相思晚望松林寺
唯有鐘聲出白雲

曾山送別

淒淒遊子若飄蓬
明月清樽祇暫同
南望千山如黛色

愁君客路在其中

送陸邃潛夫

得文
字

何事千年遇聖君
坐令雙鬢老如雲
南行更入深山舊
岐路悠悠水自分

寄振上人無碍寺所居

戀親時見住人羣
多在青山就白雲
獨坐焚香誦經處
深山古寺雪紛紛

送陸澧郭郎

纔見吳洲百草春已間燕鴈一聲新
秋風何處催年急
偏逐山行水宿人

酬張繼

悵望南徐登北固迢迢西塞望東關
落日臨川問音信
寒潮唯帶夕陽還

赴李少府莊失路

君家南郭白雲連正待情人弄石泉
月照煙花迷客路
蒼蒼何處是伊川

韓翃

漢宮曲二首

五柞宮中過臘看萬年枝上雪花殘綺牕夜閉玉堂靜
素綆朝穿金井寒

漢室長陵小市中珠簾繡戶對春風君王昨日移仙仗
玉輦將迎入漢宮

江南曲

長樂花枝雨點銷江城日暮好相邀青樓不閉歲時鎖

綠水迴通宛轉橋

看調馬

鴛鴦赭白齒新齊
晚日花中散碧蹄
玉勒斗迴初噴沫
金鞭欲下不成嘶

寒食

春城無處不飛花
寒食東風御柳斜
日暮漢宮傳蠟燭

輕烟散入五侯家

唐史遺事云德宗時制詔闕人上批曰與韓翃時有同姓名者中書再具

二人同進上書翃寒食詩末批云與此韓翃

送客知鄂州

江口千家帶楚雲
江花亂點雪紛紛
春風落日誰相見
青翰舟中有鄂君

宿石巴山中

浮雲不共此山齊
山靄蒼蒼望轉迷
曉月暫飛千樹裏
秋河隔在數峰西

贈張千牛

蓬萊闕下是人家
上路新迴白鼻騮
急管畫催平樂酒

春衣夜宿杜陵花

題玉真觀李秘書院

白雲斜日影深松
玉宇瑤壇知幾重
把酒題詩人散後
華陽洞裏有疎鐘

送客貶五谿

南過猿聲一逐臣
迴看秋草淚沾巾
寒天暮雨空山裏
幾處蠻家是主人

送齊山人歸長白山

舊事山人白兔公掉頭歸去又乘風柴門流水依然在
一路寒山萬木中

盧綸

宮中樂二首

一作天長
地久詞

臺殿雲涼秋色微君王初賜六宮衣樓船汎罷歸猶早
行遣才人鬪射飛

雲日呈祥禮物殊彤庭生獻五單于塞垣萬里無飛鳥
可是邊城用郅都

曲江春望

菖蒲翻葉柳交枝
暗上蓮舟鳥不知
更到蘆花最深處
玉樓金殿影參差

春日有懷

桃李風多日欲陰
伯勞飛處落花深
貧居靜久難逢信
知隔春山不可尋

與從弟同下第出關言別二首

雜花飛盡柳陰陰
官路逶迤綠草生
對酒已成千里客

望山空寄兩鄉心

出關愁暮一沾裳
滿墅蓬生古戰場
孤村樹色昏殘雨
遠寺鐘聲帶夕陽

村南逢病叟

雙膝過頤頂在肩
四鄰知姓不知年
卧驅烏雀惜禾黍
猶恐諸孫無社錢

赴虢州留別故人

世故相逢各未閒
百年多在別離間
昨夜秋風今夜雨

不知何處入空山

山店

登登山路何時盡
決決谿流到處間
風動葉聲山犬吠
幾家松火隔秋雲

別李紛

頭白乘驢懸布囊
一回言別淚千行
兒孫滿眼無歸處
惟到樽前是故鄉

唐詩品彙卷四十九